

**Bataaxal bu jékk bi Yàlla may  
Póol,  
mu bind ko waa  
Korent**

<sup>1</sup> Ci man Póol mi ñu woo ci sasub doon ndawal Almasi Yeesu, ci coobarey Yàlla, ci man la bataaxal bii bawoo, bawoo itam ci Sosten mbokk mi, <sup>2</sup> ñeel mbooloom Yàlla, mi ci Korent, yeen ñi ñu sellal ci jëmmu Almasi Yeesu, te ñu woo leen ngir ngeen doon ñu sell, ñeel itam mboolem ñiy tudde fépp fu mu mana doon, sunu turu Boroom Yeesu Almasi, mi leen moom, moom nu. <sup>3</sup> Aw yiw ak jàmm ñeel na leen, bawoo fa Yàlla sunu Baay, ak Sang Yeesu Almasi.

*Sant Yàlla war na*

<sup>4</sup> Santal leen sama Yàlla laa saxoo, ci yiw wi mu leen may ci Almasi Yeesu, <sup>5</sup> ndax lépp ngeen woomle ci moom, ci gépp kàddu, ak bépp xam-xam. <sup>6</sup> Loolu di firndeel ne la nu seedeeloон Almasi, sotti na ci yeen. <sup>7</sup> Loolu tax na ñàkkatuleen genn may, léegi bi ngeen di séentoogum peeñum sunu Boroom Yeesu Almasi. <sup>8</sup> Moo leen di dooleel ba ca mujjantal ga, ngir ngeen mucc sikk, keroog sunu bésu Sang Yeesu Almasi. <sup>9</sup> Yàllaa am kóllére, moom mi leen woo, ngir ngeen bennoo ak Doomam Yeesu Almasi, sunu Sang.

*Na mbooloo mi juboo*

<sup>10</sup> Bokk yi nag, dama leen di ñaax, ci sunu turu Sang Yeesu Almasi, ngir seen kàddu di genn, te féewaloo baña am ci seen biir, xanaa ngeen bennoo ci lépp, bokk menn xel, ak benn jëmu. <sup>11</sup> Ndax kat bokk yi, dégge naa ci waa kér Kelowe, ne am na ay dëngoo ci seen biir. <sup>12</sup> Li may wax mooy ku nekk ci yeena ngi naan: «Man ci Póol laa bokk!», «Man nag Apolos!» «Man Sefas!» «Man de Almasi!»

<sup>13</sup> Ndax Almasi dafa xaajalikoo? Ndax Póol lañu daajoon ca bant ba ngir yeen? Am ci turu Póol lañu leen sóobe ci ndox? <sup>14</sup> Maa ngi sant Yàlla, ba ma sóobulee kenn ci yeen ci ndox, ku dul Kirispus ak Gayus, <sup>15</sup> ngir kenn du ne ci sama tur lañu leen sóobe. <sup>16</sup> Ahakay! Maa sóob waa kér Estefanas itam. Waaye bu loolu weesee, fattlikuwuma fu ma sóobe keneen. <sup>17</sup> Ndax du sóobe cim ndox la ma Almasi yebale, xanaa ngir ma yégle xibaaru jàmm bi, te bañ koo defe xareñtey kàddu, ngir baña neenal bantub Almasi, ba ñu ko daajoon.

### *Xam-xam, fa Yàlla*

<sup>18</sup> Ndax kat kàddu gi jëm ci bantub Almasi, ba ñu ko daajoon, ag ndof la ci ñiy sàndu. Waaye manoore Yàlla la ci nun ñi mucc. <sup>19</sup> Ndaxte bindées na ne:

«Maay yàq xam-xamu xamkat yi,  
ñi xelu, ma neenal seenum xel\*..»

<sup>20</sup> Ana kuy xamkat? Ana kuy firikatub yoon?  
Ana waxkatub àddinay tey jii? Xanaa du Yàllaa def xam-xamu àddina si ag ndof? <sup>21</sup> Yàlla moo

---

\* <sup>1:19</sup> 1.19 Seetal ci *Esayi* 29.14.

dogal ci xam-xamam, àddina tèle koo xam ci xam-xamu boppam. Moo tax mu soob Yàlla, mu jefandikoo xibaaru Almasi, biy ag ndof ci nit ñi, ngir musale ko gëmkat ñi. <sup>22</sup> Yawut yi, ay takk lañuy laaj, Gereg yi di wut xam-xam. <sup>23</sup> Nun nag, nuy waare Almasi bu ñu daaj ci bant, muy njombe ci Yawut yi, di ag ndof ci jaambur ñi dul Yawut. <sup>24</sup> Waaye ci ñi ñu woo, ñuy Yawut, di Gereg, Almasi mooy manoorey Yàlla, di xam-xamu Yàlla. <sup>25</sup> Ndaxte li ñu jàppe ag ndof fa Yàlla moo sut xam-xamu nit, te li ñu jàppe néew dooley Yàlla moo raw dooley nit.

<sup>26</sup> Bokk yi, seetleen ñan ngeen woon, ba ñu leen di woo. Barewul ci seen biir ay xamkat, ci gis-gisu nit ñi, barewul ci yeen ay boroom doole, barelewuleen ñu rafet ab juddu. <sup>27</sup> Waaye li àddina jàppe ag ndof, moom la Yàlla taamu, ngir rusloo ko xamkat yi, te li néew doole ci àddina, moom la Yàlla taamu, ngir rusloo ko li bare doole. <sup>28</sup> Li tuut ab juddu ci àddina, ak li xeeblu, li tekkiwul dara, moom la Yàlla taamu, ngir neenale ko li tekki, <sup>29</sup> ba tax kenn du mana damu ci kanam Yàlla. <sup>30</sup> Te moom it moo tax ngeen bokk ci Almasi Yeesu, mi ñu def muy sunu xam-xam bu bawoo fa Yàlla, di sunu njekk, di sunu sellte, di sunug njot, <sup>31</sup> su ko defee, noonu ñu binde ne: «Kuy damu, na damu ci Boroom bi†,» noonu lay ame.

## 2

<sup>1</sup> Man ci sama bopp, bokk yi, bi ma dikkee

---

† <sup>1:31</sup> 1.31 Seetal ci Yeremi 9.23.

ci yeen, du ci puukarey kàddu yu gëna taaru, ak xam-xam bu ma leen yégalsee mbóoti Yàlla. <sup>2</sup> Doguwuma woon xam lenn ci seen biir, lu moy Yeesu Almasi, kooku ñu daaj ca bant ba. <sup>3</sup> Man daal, ci sama biir néew dooley bopp, ak ragal bay kat-kati, laa nekke woon ak yeen. <sup>4</sup> Sama kàddu ak samam njàngle jotewul woon dara ak neex làmmiñ gu xam-xamu nit ràbb, waaye dafa di ay firnde yu manooreg Noowug Yàlla lañal, <sup>5</sup> ngir seen ngëm baña sukkandiku ci xam-xamu nit, te sukkandiku ci manooreg Yàlla.

### *Xelum Yàlla mooy xamle xam-xamu Yàlla*

<sup>6</sup> Moona xam-xam lanuy xamle ci biir gëmkat ñi mat, waaye du xam-xamu xarnu bii, ak bu njiiti xarnu bii, di nit ñuy wéy. <sup>7</sup> Li nuy biral kay, da di mbóotum xam-xamu Yàlla mu làqu woon, te Yàlla dogaloon nu koo terale, laata àddina di sosu. <sup>8</sup> Boobu xam-xam, kenn ci njiiti xarnu bii xamu ko woon, ndax su ñu ko xamoon, kon duñu daaj Sang bu tedd bi ci bant. <sup>9</sup> Mooy noonu ñu binde rekk ne:

«Lu bët gisul,  
nopp déggú ko,  
xel daju ko,

Yàllaa ko dencal ñi ko sopp\*..»

<sup>10</sup> Waaye nun la ko Yàlla feeñalale am Xelam.

Ndaxte Xelum Yàlla lépp lay gëstu ba ci xóotey mbóoti Yàlla. <sup>11</sup> Kan ci nit ñi moo xamal kenn nit, lenni biiram? Xelum nit ki ci biir nit ki doñj moo mana xam biiram. Yàlla itam noonu la. Kenn xamul mbirum Yàlla, ku moy Xelum

---

\* **2:9** 2.9 Seetal ci *Esayi* 64.3.

Yàlla. <sup>12</sup> Nun nag du xelum àddina lanu jot, waaye Xel mi bawoo fa Yàlla lanu jot, ngir nu mana ràññee li nu Yàlla baaxe. <sup>13</sup> May yooyu lanuy biral, te waxewunu ko njànglem xam-xamu nit, waaye njànglem Xelum Yàlla lanu koy waxe, di jéfandikoo kàddu yu làmboo Xel mi, ngir teqantal ay mbir yu làmboo Xel mi.

<sup>14</sup> Nitu neen nag du nangu lu aju ci Xelum Yàlla. Ag ndof lay doon ci moom; du ko mana xam, ndax loolu Xelum Yàlla lees koy natte. <sup>15</sup> Nit ki ànd ak Xelum Yàlla nag moo mana natt lépp, te moom ci boppam, kenn du ko mana natt.

<sup>16</sup> Moo tax ñu ne:

«Ana ku xam xalaatu Boroom bi,

ba man koo digal†?»

Waaye nun nag noo yor xalaatu Almasi.

### 3

#### *Par-parloo warul gëmkat ñi*

<sup>1</sup> Man nag bokk yi, manuma woona wax ak yeen ni ñuy waxe ak ñu ànd ak Xelum Yàlla, waaye ni niti suuxu neen rekk laa manoona waxe ak yeen, mbete ñu diy tuut-tànk ci yoonu Almasi. <sup>2</sup> Meew laa leen iota nàndal, waaye leeluma leen dugub, ndax àttanuleen ko woon, te ba léegi sax àttanuleen ko, <sup>3</sup> nde yeeda ngi ba tey ci seenug nitey suuxu neen. Ndax gannaaw kiñaan ak ñaayoo ngi ci seen biir, du ay niti suuxu neen ngeen ba tey, di doxale ni niti àddinay kese? <sup>4</sup> Bu kenn naan: «Man ci Póol

---

† **2:16** 2.16 Seetal ci *Esayi* 40.13.

laa bokk,» keneen naa: «Man nag Apolos,» ndax kon dungeen niti àddinay kese?

<sup>5</sup> Ana kuy Apolos sax? Ak kuy Póol? Xanaa ay surga doñj yu ngeen jaare, ba gém, ni Boroom bi jagleele kenn ku nekk ci nun, aw sasam. <sup>6</sup> Maa jëmbat, Apolos suuxat, waaye Yàlla moo jebbil. <sup>7</sup> Ki jëmbat nag, ak ki suuxat, kenn du ci dara, xanaa Yàlla miy jebbil doñj. <sup>8</sup> Ki jëmbat, ak ki suuxat ñoo yem kepp, waaye ku ci nekk kemu liggéeyu boppam lay yooloo. <sup>9</sup> Noo bokk diy surga ci liggéeyu Yàlla bi; yeen ngeen di toolu Yàlla, di tabaxub Yàlla.

<sup>10</sup> Yiwu Yàlla wi mu ma may nag, ci laa lale kenu gi, ni tabaxkat bu xareñ, keneen di tabax ca kaw. Waaye na ku nekk xool bu baax na mu cay tabaxe. <sup>11</sup> Geneen kenu moom maneesu koo lal, xanaa gi xasa lale, te mooy Yeesu Almasi. <sup>12</sup> Ku tabax ci kaw kenu gi nag, nga tabaxe wurus, mbaa xaalis, mbaa per, mbaa dénk, mbaa gattax, mbaa boob, <sup>13</sup> ku ci nekk, sab liggéey dina feen, ndax bés baa koy xamle, nde sawara lees koy feeñale. Ku ci nekk, ak lu sa xeetu liggéey mana doon, sawara lees koy natte. <sup>14</sup> Ku liggéeyoon ba la nga tabaxoon ca kaw kenu ga des, dinga yoolu. <sup>15</sup> Waaye ku sab liggéey lakk, ñàkk nga. Yaw ci sa bopp nag dinga mucc, mel ni ku rëcce cig lakk rekk.

<sup>16</sup> Xanaa xamuleen ne kér Yàlla ngeen, te Noowug Yàlla moo dëkk ci yeen? <sup>17</sup> Ku yàq kér Yàlla nag, kooku Yàlla dina ko yàq, ndax kér Yàlla dafa sell, te mooy li ngeen doon.

<sup>18</sup> Bu kenn nax boppam: Ku teg boppam ci yeen, boroom xam-xam, ni xarnu bii jàppe xam-

xam, kooku na doon ab dof, ngir am xam-xam bi wóor. <sup>19</sup> Ndaxte xam-xamu àddina sii, ndof la fa Yàlla. Moo tax bindees na ne: «Mooy kiy jàpp ñi muus ci seen pexey muusaatu\*,» <sup>20</sup> tegati ca ne: «Boroom bi xam na xalaati boroom xel yi te xam na ne neen la†.»

<sup>21</sup> Kon nag bu kenn puukarewoo ay nit, ndax lépp, yeena ko moom, <sup>22</sup> muy Póol, di Apolos, di Sefas, di àddina, di dund, di ndee, di tey, di èllëg, lépp, yeena ko moom. <sup>23</sup> Yeen nag, Almasi moo leen moom, te Almasi, Yàllaa ko moom.

## 4

### *Àtteb Yàlla doy na Póol*

<sup>1</sup> Dees noo wara jàppe ay surgay Almasi, ay saytukati mbóoti Yàlla. <sup>2</sup> Te itam li ñuy sàkku ci ay saytukat moo di ñu jara wóolu. <sup>3</sup> Man nag, su dee yeena dogal samab àtte, mbaa kurélu nit a dogal samab àtte, soxaluma lool, te dogalaluma sama bopp ab àtte it, <sup>4</sup> ndax amul dara lu may yedde sama bopp. Waaye nag loolu mayu ma njekk, nde kiy dogal samab àtte mooy Boroom bi. <sup>5</sup> Moo tax buleen àtte lenn te jotul, lu jiitu Boroom biy dikk. Moom mooy leeral li làqoo ag lëndëm, di làññi mèbèti xol. Su boobaa ngérëm la ku nekk yellow, fa Yàlla lay bawoo.

<sup>6</sup> Bokk yi, loolu de laa natte ci Apolos ak ci man, ñeel leen, ngir ngeen jànge ci sunu ñaari jëmm, ba sàmm solob kàddu gii: «Bu seen xalaat jàll ca wàlla li Mbind mi wax.» Su ko defee dungeen

---

\* **3:19** 3.19 Seetal ci Ayóoba 5.13. † **3:20** 3.20 Seetal ci Sabóor 94.11.

réy-réyloo far ak kenn, di beddi keneen. <sup>7</sup> Ana ku la def nga gën ci nit ñi? Ana loo am lu ñu la joxul? Te ndegam dees la koo jox, ana loo koy puukarewoo, mbete lees la joxul?

<sup>8</sup> Yeen daal suur ngeen xaat! Woomle ngeen xaat! Yeena ngi tàmbalee nguuru, te xaaruleen nu ci sax! Céy su ngeen doon nguuru léegi, ba nun itam nu mana nguuroondoo ak yeen!

<sup>9</sup> Ndaxte damaa foog ne, nun ndawi Almasi, Yàllaa nu fésal ca sàppeb gannaaw ba, mbete nit ñu ñu teg àtteb dee, ngir nu doon ceetaanum àddina wérngal këpp, malaaka ak nit. <sup>10</sup> Nun, ay dof lanu ngir Almasi; yeen, yeena muus nu ngeen bokke ci Almasi! Nun noo néew doole; yeen, yeena am doole. Yeen it lañu naw, waaye nun, dees noo xeeb! <sup>11</sup> Ba fii nu tollu, xiif ak mar ak rafle, aki dóor lanu nekke, di taxawaalu. <sup>12</sup> Danuy ñaq, di dunde sunu liggéeyu loxo, nit ñi di nu saaga, nu di leen ñaanal, ñu di nu bundxatal, nuy muñ. <sup>13</sup> Nu ngi nuy baatal, nun nuy wax lu rafet ci nit ñi, nu mujj mel ni mbalitu àddina, di mbuubitu ñépp ba fii nu tollu.

<sup>14</sup> Kersaal leen nag taxul ma bind leen lii, waaye dama leen koy artoo, ndax yeenay sama doomi bopp. <sup>15</sup> Su ngeen amoon fukki junniy njiit yu leen di sàmm ci yoonu Almasi it, du tax ngeen am lu wees benn baay, te man maa leen àgge xibaaru jàmm bi, ba tax ma di seen baay ci yoonu Almasi Yeesu. <sup>16</sup> Kon nag maa ngi leen di tinu, ngir ngeen roy ci man. <sup>17</sup> Looloo tax ma yebal ci yeen Timote, sama doomu bopp, ji sax ci yoonu Sang bi. Moo leen di fattli samay doxalin

ci yoonu Almasi, noonu ma koy jàngleel fépp, ci mépp mbooloom gëmkat.

<sup>18</sup> Am na nag ñuy réy-réylu ci seen biir, mbete duma délseeti ci yeen. <sup>19</sup> Waaye maa ngi dikk léegi ba ci yeen, ndegam soob na Boroom bi, ba nattal sama bopp manoore ju réy-réylukat yooyu am, te duy kàddu kese. <sup>20</sup> Ndaxte nguurug Yalla du ci waxy kese, waaye manoore la. <sup>21</sup> Ana lu leen gënal? Ma dikke leen ab yar, am ma dikke leen cofeel ak yérmande?

## 5

### *Buleen xajoo powum séy*

<sup>1</sup> Déggees na nag ci lu wér, ne powum séy am na ci seen biir, te powum séy mu ni mel, giseesu ko sax ci biir xeeti yéefar yi. Dem na sax ba nit nekk ak jabaru baayam. <sup>2</sup> Moonaa yeen de, yeena ngi ciy réy-réylu te waroon koo ñaawlu, ba dàqees kiy def jëf ju ni tollu ci seen biir! <sup>3</sup> Man ci sama wàllu bopp nag, jëmm ji wuute na, waaye xel mee fa teew. Ki def jooju jëf nag, niki su ma teewoon, dogal naa xaat ab àtteem, <sup>4</sup> ci turu Sang Yeesu. Bu ngeen dajee, te ma bokk ak yeen teewe ko samam xel, ci sunu kàttanu Boroom Yeesu, <sup>5</sup> dàqleen nit kooku, jébbal ko Seytaane, ngir sànkutey yaramam, ndax aw fitam mucc, keroog bésu Boroom bi.

### *Lawiir misaal na bákkaar*

<sup>6</sup> Seen damu gii de jekkul dara. Xanaa xamuleen ne as lawiir tooyalu sunguf bépp lay funkil? <sup>7</sup> Setal-leen seen bopp boog, génneleen

lawiir\* bu yàgg bi ci seen biir, ba mana doon tooyal bu bees bu mucc lawiir, nde doon ngeen ko ba noppi, ndax Almasi, sunu gàttub bésub Mucc biy sunub sarax, rendilees na nu ko. <sup>8</sup> Kon nag, nanu màggal sunu bésub Mucc te bañ koo màggale lawiir bu yàgg, mbaa lawiiru yàqute akug mbon, xanaa nu màggale ko mburu mu mucc lawiir, mburum xol bu set te dëggu.

<sup>9</sup> Bindoon naa leen ca sama bataaxal ba, ne buleen amlante ak fokati séy yi. <sup>10</sup> Waaye moos fokati àddina sii taxul woon may wax, mbaa bëgge yi ak ñàppaaral yi ak bokkaalekat yi, nde kon fàww ngeen génn àddina. <sup>11</sup> Dama leena bind, ne leen buleen amlante ak ku tuddoo mbokkum gëmkat, te di fokatub séy, mbaa mu dib bëgge, mbaa mu dib bokkaalekat, mbaa ab saagakat, mbaa mändikat, mbaa ab ñàppaaral. Ku ni mel, buleen bokk ak moom lekk sax.

<sup>12</sup> Ana sax luy sama yoon ci waa biti ba di leen àtte? Su dee waa biir mbooloom gëmkat ñi nag, yeena leen wara àtte. <sup>13</sup> Waa biti ñoom, Yalla moo leen di àtte. Yeen, nag: «Tenqeeleen ku bon ci seen biir.»

## 6

### *Layoob biiri bokk rafetul*

<sup>1</sup> Te it ku ci jote ak mbokkum gëmkatam, ana nu mu saña àttelujee mbir mi ci aji jubadi, ñi séq ëttu yoon, te bañ koo àtteluji ca aji sell ña? <sup>2</sup> Xanaa xamuleen ne aji sell ñi ñooy àtteji àddina? Ndegam yeenay àtteji àddina,

---

\* <sup>5:7</sup> 5.7 Seetal ci Mucc ga 12.3-21.

xanaa àtte mbir yi göna tuut jombu leen? <sup>3</sup> Am xamuleen ne malaaka yi sax, nun noo leen di àtteji, astamaak mbiri dund gii? <sup>4</sup> Kon nag bu ngeen amee ay jotey dund gii, ana lu ngeen diiseji seen mbir, ay nit ñu mbooloom gömkat ñi nawloowul? <sup>5</sup> Li may wax gàcce la ci yeen. Xanaa amul ci seen biir, benn boroom xel bu mana àtte ay bokkam? <sup>6</sup> Ab gömkat daal mooy yóbbu mbokkum gömkatam ci yoon? Te loolu ci kanam aji gömadi ñi sax lañu koy defe far!

<sup>7</sup> Layoo bi ci seen biir rekk firndeel na xaat ne daanu ngeen jéll bu réy. Lu leen tee muñ ag tooñ? Lu leen tee faaleedi alal ju ñu leen jélal?  
<sup>8</sup> Waaye yeen ci seen bopp sax yeenay tooñ aka jélal ay nit? Te seen bokki gömkat ngeen koy def!

<sup>9</sup> Am xamuleen ne aji jubadi ñi amuñu cér ci nguurug Yàlla? Bu leen kenn nax: Muy fokati séy yi, di bokkaalekat yi, di jaalookat yi, di góorjigéen yi, ak ñiy ànd ak ñoom, <sup>10</sup> ak sàcc yi ak bëgge yi ak mändikat yi ak saagakat yi ak ñàppaaral yi, duñu am cér ci nguurug Yàlla.  
<sup>11</sup> Te loolu la ñenn ci yeen doonoon. Waaye Yàllaa leen fóot, sellal leen, jubal leen, ci turu Sang Yeesu Almasi, ak ci sunu Noowug Yàlla.

### *Na yaramu gömkat bi teral Sang bi*

<sup>12</sup> «Lépp laa am sañ-sañam,» lañu wax. Waaye du lépp ay jariñe. Lépp laa am sañ-sañam, waaye duma nangu lenn man ma. <sup>13</sup> Ñenn a ngi naan: «Aw ñam, biir la ñeel; te biir it, aw ñam la ñeel.» Muy dëgg it, te Yàlla mooy neenal ñam wi, ak biir bi mu jém. Waaye taxul yaramu gömkat bi ñeel powum séy. Sang bi

kay la yaramu gëmkat bi ñeel, te Sang bi it, ñeel yaram wi. <sup>14</sup> Yàlla, mi dekkal Sang bi nag, mooy dekkal it sunu yaram ci kàttanam. <sup>15</sup> Xanaa xamuleen ne, seen yaram mooy céri Almasi? Waaw, ndax damay jël céri Almasi, def ko céri gànc bu jigéen? Yàlla tere! <sup>16</sup> Xanaa xamuleen ne, kuy taqoo ak ab gànc bu jigéen, mook moom, jenn jëmm lañuy doon? Ndaxte noonu lañu waxe ne: «Ñoom ñaar ay mujj di wenn suux doñj\*.» <sup>17</sup> Waaye ku taqoo ak Sang bi, yaak moom genn noo ngeen di doon.

<sup>18</sup> Dawleen powum séy! Mboolem bàkkaar bu nit mana def, bàkkaar ba du jote dara ak yaramam, waaye fokat bi, yaramu boppam lay lore bàkkaaru powam. <sup>19</sup> Dangeena xamul ne seen yaram mooy màkkaanu Noo gu Sell, gi ci yeen, Noo gi ngeen jote ci Yàlla? Moomuleen seen bopp, <sup>20</sup> ndax dees leena jot, ba fey njég ga. Kon nag seen yaram, terale leen ko Yàlla.

## 7

### *Lu jëm ci mbirum séy*

<sup>1</sup> Sama tont ci mbir mi ngeen ma bind nag, moo di lu baax la ci góor, mu mucc ci jigéen\*. <sup>2</sup> Waaye moytu powum séy war naa tax ba góor gu nekk am jabaram, jigéen ju nekk it, am

---

\* **6:16** 6.16 Seetal ci Njàlbéen ga 2.24. \* **7:1** 7.1 Li Póol ne lu baax la ci góor, mu mucc ci jigéen, jombul muy waxi boppam. Waaye man naa doon it waxi waa Korent yu mu jottli.

jëkkëram. <sup>3</sup> Jëkkër ji war naa def warugaru jëkkër ci jabaram; naka noonu it, jabar ji war naa def warugaru jabar ci jëkkëram. <sup>4</sup> Jigéen ji moomul yaramam, moom donj, waaye jëkkër ji it am na ci sañ-sañ. Naka noonu it, jëkkër ji moomul yaramam, moom donj, waaye jabar ji it am na ci sañ-sañ. <sup>5</sup> Buleen di xañante seen bopp, ndare du yeena mènkoo ab diir, ngir bokk ténku ci ñaan. Waaye gannaaw loolu, delluleen di ànd, bala leena Seytaanee xiirtal ci moy, ndax télee téye seen bopp. <sup>6</sup> Loolu ma leen wax nag mooy li leen yoon may, waaye du ndigal. <sup>7</sup> Ndaxte su ma sañoon kay ñépp toog ni man; waaye ku nekk ak jagleb boppam bu ko Yàlla baaxe, kii lii, kee lee.

<sup>8</sup> Li may wax gëmkat ñi séqul ak kenn ab séy, ak ñi seen jëkkër faatu daal moo di, su ñu wéyee toog noonu ni man mii, lu baax la ci ñoom.

<sup>9</sup> Waaye su ñu manula maandu, nañu séy, ndax séy moo gën seen xéraangey bakkan xabtal leen.

<sup>10</sup> Ñi séq ab séy nag, maa leen dénk lii, te du sama ndigal, ndigalal Boroom bee. Jabar ji, bumu teqlikoo ak jëkkëram. <sup>11</sup> Te bu teqlikoo ak jëkkëram it, na toog, baña séyaat, mbaa mu juboo ak jëkkëram. Te jëkkër ji it bumu fase jabaram.

<sup>12</sup> Ñi ci des nag, li ma xalaat te du Boroom bee ko wax, maa ko waxal sama bopp, moo di: ab gëmkatub Almasi, bu amee jabar ju gëmul, te teewul mu nangu koo séyal ba tey, bumu ko fase. <sup>13</sup> Ab gëmkatub Almasi it, bu amee jëkkër ju gëmul, te teewul mu nangoo nekk ak moom,

bumu tas. <sup>14</sup> Ndaxte jëkkér ji gëmul day daldi séddu sellnga ndax jabaram ja dib gëmkat, te jigéen ji gëmul it day séddu sellnga ca jëkkéram jay gëmkat. Su dul woon noonu doom yu ngeen ca am di ñu sobewu, te bir na ne doom yu ngeen ca am, ñu sell lañuy doon. <sup>15</sup> Ndegam nag ki gëmul daa bëgga dem, na dem. Su demee noonu, mbokkum gëmkat bu góor bi, mbaa ku jigéen ki amatul benn gallankoor, waaye ci jàmm la leen Yàlla woo. <sup>16</sup> Yaw miy jabar ji nag sa texey jëkkér man naa jaare ci yaw, jombul; yaw jëkkér ji it, sa texey jabar jaare ci yaw, jombul. <sup>17</sup> Lu ko moy nag, ku ci nekk, cér ba la Boroom bi séddoon, noonee nga nekke woon ba la Yàlla di woo, nanga ko wéye. Loolu laa santaane ci mboolooy gëmkat ñépp. <sup>18</sup> Ki xarafoon bala ñu koy woo, bumu làq mändargam xaraf ma. Ki xaraful woon ba ñu koy woo, bumu xaraf. <sup>19</sup> Xaraf amul solo, ñàkka xaraf amul solo. Li am solo moo di topp ndigali Yàlla. <sup>20</sup> Ku nekk, nekkin wi nga nekke woon ba ñu lay woo, nanga ko wéye. <sup>21</sup> Ndax ab jaam nga woon, ba ñu lay woo? Amul solo. Waaye soo manee yiwiku, yiwikul. <sup>22</sup> Ki ñu woo ci Sang bi, fekk ko mu dib jaam, mooy ki Sang bi goreel. Naka noonu, gor si ñu woo, ab jaamu Almasi lay doon. <sup>23</sup> Gannaaw feyees na seen njég ba jot leen nag, buleen doon jaamub nit. <sup>24</sup> Bokk yi, ku ci nekk daal, nekkin wa nga nekke woon ba ñu lay woo, wéye ko rekk fi kanam Yàlla.

<sup>25</sup> Ci wàllu janq ji séyagul, awma ci ndigalu Boroom bi, xanaa ma wax ci sama xalaat bu mata gëm, ndax yërmande ji ma Boroom bi

baaxe. <sup>26</sup> Lii mooy li ma foog ne mooy li baax, ndax njàqarey jamonoy tey. Li baax ci nit ki daal mooy mu wéye li muy dund tey. <sup>27</sup> Dangaa am jabar? Bul sàkku pase. Am amuloo jabar? Kon bul sàkku jabar. <sup>28</sup> Waaye nag soo takkee jabar, bàkkaaruloo; ab janq it, bu séyee, bàkkaarul. Waaye ñi séq ab séy dinañu am naqaru àddina, te naqar woowu laa leen bëggoona fanqal.

<sup>29</sup> Li may wax, bokk yi, moo di, li des yàggatul. Kon nag bés niki tey, na ñi am jabar mel ni bu ñu ko amul woon; <sup>30</sup> ñiy jooy mel ni ñu jooyul; ñi bég, mel ni ñu bégul; ñi jënd, mel ni ñu moomul li ñu jënd; <sup>31</sup> ñiy jariñoo alalu àddina, bañ cee xér, ndax melow àddina sii tey, day wees.

<sup>32</sup> Sama coobare mooy, yeen gëmkati Almasi, ngeen mucc ci xalaat yu ub seen bopp. Te ku amul jabar, mbiri Boroom bi lay xalaat, ak nu muy dabe bànnexu Boroom bi. <sup>33</sup> Waaye ku am jabar, mbiri àddina lay xalaat, ak nu muy dabe bànnexu jabaram, <sup>34</sup> mu daldi njarale. Jigéen ju séyul, mbaa ab janq, mbiri Boroom bi lay xalaat, di namma sellal yaramam akum xelam. Waaye kiy séy, mbiri àddina lay xalaat, ak nu muy dabe bànnexu jëkkëram. <sup>35</sup> Lii nag, seen njariñ a ma ko taxa wax, nammuma leen koo tege ab gallankoor, li ma ci namm mooy ngeen di def li jekk, te taxawal temm Boroom bi, taxawaay bu leen benn xalaatu àddina dul féle.

<sup>36</sup> Waaye su amee ku jàpp ne jëfewul nu jekk, ak janq bu mu digool ab séy, te janq ba jëm

mag†, ba mu xalaat ne takk ko rekk moo ci war, na matal yéeneem, takk ko. Su defee noonu, bakkhaarul. <sup>37</sup> Waaye ki dogu dëgg ci xolam, te du ndigalu gäntal lu mu sañula bañ, xanaa ci sagoy boppam donj la dogoo ne du jël janq bi mu digooloon ab séy, kooku ba tey, def na lu baax. <sup>38</sup> Kon ki jël ab janqam bu mu digool ab séy, def na lu baax, waaye ki jélul ab janqam moo def li gën.

<sup>39</sup> Jabar nag, buumu jékkëram a ngi ci baatam, li feek jékkëram a ngi dund. Waaye su jékkér ji faatoo, sañ naa séy ak ku ko neex, ndegam gëmkatub Almasi la séyal. <sup>40</sup> Doon na gëna bég nag, su toogoon, baña séyaat, ci sama xalaat, te man it defe naa ne Noowug Yàlla mu ngi ci man.

## 8

### *Lu jëm ci ñam wu ñu sarxal ay tuur*

<sup>1</sup> Su dee wàllu ñam wu ñu sarxal ay tuur, dëgg la, nun ñépp am nanu xam-xam ci moomu mbir. Xam-xam nag day tax nit a réy-réylu, waaye cofeel day yokke. <sup>2</sup> Ku xalaat ne yaa xam lenn, xamaguloo ni nga wara xame. <sup>3</sup> Waaye ku sopp Yàlla, Yàlla xam la.

<sup>4</sup> Kon su dee wàllu ñam wu ñu sarxal ay tuur, xam nanu ne ay tuur du dara ci àddina, te Yàlla kenn la. <sup>5</sup> Doonte am na yu ñuy wooye ay yàlla, te muy lu nekk ci asamaan mbaa ci suuf, te dëgg la, bare na ñu ñu neey ay yàlla lañu, bare na it ñu ñu neey ay sang lañu. <sup>6</sup> Teewul ci sunu wàllu

---

† **7:36** 7.36 Manees na ko tekkee nii itam: te xemmemtéefam ci ndaw si èpp ko doole.

bopp, jenn Yàllaa am, muy Baay bi lépp jóge ci moom, te sunu bakkan ñeel ko, benn Sang donjñ a am, muy Yeesu Almasi, bi lépp ame ci moom, te sunu bakkan, ci moom la ame.

<sup>7</sup> Waaye du ñépp a xam loolu. Am na gëmkat ñu seen miineelu tuur yi bàyyeegul, ba léegi, te moo tax bu ñu lekkee ñam wu ñu foog ne saraxi tuur la, seen xel mu daladi moo leen di foogloo ne sobe toppe na leen ca ñam wa. <sup>8</sup> Waaye du wenn ñam wu nuy jegele ak Yàlla. Nu lekk ko, ak nu bañ koo lekk, du nu yokk, du nu wàññi.

<sup>9</sup> Waaye ni ngeen di dunde seen sañ-sañu bopp, dangeen ciy xool ñi seen ngëm dëgérul, ngir ngeen bañ leena yóbbe bàkkaar. <sup>10</sup> Yaw mi réy xam-xam, ku la gis ca ndab la ca jaamookaayu tuur ya, su dee ab gëmkat bu xelam daladi ndax ngëm gu desee dëgér, mbaa du ko xiir ci roy la, ba mu lekk ca ñamu sarax sa? <sup>11</sup> Te su demee noonu nag, su boobaa sa xam-xam bu réy ngay sàanke sa mbokkum gëmkat bu néew doole boobu Almasi deeyal! <sup>12</sup> Su ngeen tooñee noonu bokki gëmkat ñi, ba yàq seen xel mu daladi, kon de Almasi ngeen tooñ. <sup>13</sup> Moo tax, su dee aw ñam wu ma lekk mooy tax ma bàkkaarloo sama mbokkum gëmkat, dootuma lekk mukk aw yàpp ci àaddina, ngir baña bàkkaarloo sama mbokkum gëmkat.

## 9

### *Póol muñ na lu ko lew*

<sup>1</sup> Du maa moom sama bopp? Am du man, ndawal Almasi laa? Xanaa gisuma Yeesu sunu

Boroom? Xanaa du sama liggéey ci Sang bi, moo di yeen ci seen bopp? <sup>2</sup> Ndegam ci ñeneen, man duma ndawal Almasi, xanaa ci yeen boog, moom laa, ndax liy firndeel sama sasu ndaw ci Sang bi, yeen la.

<sup>3</sup> Lii nag moo di sama tont ak ñi may sikkal: <sup>4</sup> xanaa nun amunu sañ-sañu jël ag lekk ak ag naan, ngir liggéey bi nu sasoo? <sup>5</sup> Am sañunoo yóbbaaale mbokkum gëmkat buy sunu soxna, ni yeneen ndawi Almassi, ak doomi ndeyi Sang bi, ak Sefas? <sup>6</sup> Am boog mennum man ak Barnaba doñj noo amul sañ-sañu ñàkka daan sunu doole?

<sup>7</sup> Kan moo masa ràngu liggéeyu coldaar, te léppam war ko? Ana kuy jëmbat téokérub reseñ, te du lekk ca doom ya? Mbaa kan mooy sàmm ag jur, te du naan ca soowum jur ga? <sup>8</sup> Te lii may wax sax, du ci gis-gisu nit doñj laa ko teg, xanaa du yoonu Yalla itam, loolu la wax? <sup>9</sup> Bindees na ci yoonu Musaa kay ne: «Bul sunjuñ gémmiñu nag te fekk koy bojj am pepp.» Ndax Yalla nag yi doñj la tiisoo? <sup>10</sup> Am du noo tax muy wax? Nun kay noo tax ñu bind loolu, ndax kuy bey, sañ cee yaakaar, kuy bojj it, sañ cee yaakaar wàllam. <sup>11</sup> Ndegam alali xol lanu ji ci yeen, su nu góobee koomu àaddina gu bawoo ci yeen, day èpp a? <sup>12</sup> Ndegam ñeneen a jagoo boobu sañ-sañ ci yeen, astamaak nun.

Waaye nag jariñoowunu sañ-sañ boobu. Lépp lanu far muñ, ngir baña gallankoor yoonu xibaaru jàmm bu Almasi. <sup>13</sup> Xanaa xamuleen ne, ñiy liggéeye ci kérug Yalla gi, ci kérug Yalla gi lañuy jéle seen lekk, te ñi sasoo sarxalukaay bi,

am nañu wàll ci sarax ya ñu fa joxe? <sup>14</sup> Naka noonu it, Sang bi moo digle ne ñiy yégle xibaaru jàmm bi, nañu ci dund.

<sup>15</sup> Waaye man jariñoowuma lenn ci sañ-sañ yooyu, te binduma lii it ngir defalees ma noonu. Xanaa dee sax a may gëná—boobu sañ-sañu kañu daal, kenn du ma ko yàqal! <sup>16</sup> Yégle xibaaru jàmm bi moom, du lu may kañoo. Wartéef la wu ñu ma sas, te ngalla man, su ma yéglewul xibaaru jàmm bi! <sup>17</sup> Su ma yebu woona def lii ci sama coobarey bopp, dinaa ci am peyoor. Waaye gannaaw dees maa dénk ag caytu, te ajuwul ci sama coobare, <sup>18</sup> kon ana lu ciy sama peyoor? Xanaa ma man di yégle xibaaru jàmm bi ci dara, ba dumaa jariñoo sañ-sañu dunde xibaaru jàmm bi may yégle.

<sup>19</sup> Te itam as gor laa, kenn moomu ma; teewul jaamu ñépp laa def sama bopp, ngir gëna iril Sang bi aw nit. <sup>20</sup> Ba ma nekkee ci biir Yawut yi, ni Yawut yi laay def, ngir iri leen. Ba ma nekkee ak ñi tegoo yoonu Musaa, damaa mel ni yoonu Musaa laa tegool, ngir iri ñi tegoo yoonu Musaa, te man ci sama bopp, tegooowuma yoonu Musaa. <sup>21</sup> Maak ñi amul yoonu Musaa, damaa mel ni ku amul yoonu Musaa, ngir iri leen, doonte ñàkkuma yoonu Yàlla, gannaaw maa ngi ci yoonu Almasi. <sup>22</sup> Maak boroom ngëm yi desee dëgér, damaa mel ni ku ngëmam desee dëgér, ngir iri leen. Lépp laa def sama bopp ci ñépp, ak nu mu mana deme, ba musal ñennat. <sup>23</sup> Loolu lépp def naa ko ndax xibaaru jàmm bi, ngir am ci wàll.

<sup>24</sup> Xanaa xamuleen ne, ab rawante, ñépp a cay daw, waaye kenn doñj ay jél ndam li? Dawleen nag ba jél ndam li. <sup>25</sup> Jonjantekati tåggat yaram yi, dañuy yar seen yaram bu metti, te ñooñu kaalag ndam guy seey doñj lañu ci yaakaar, waaye nun, kaalag ndam gu sax dàkk lanu ci yaakaar. <sup>26</sup> Man nag noonu laay dawe, waaye samaw xél ñàkkul ab jëmu. Noonu laay këmëxee it, waaye dóoruma ci jaww ji. <sup>27</sup> Damay yar sama yaram yar bu metti kay, ba moom ko, ndax èllëg ñu bañ maa doyadal, gannaaw bu ma xamalee ñeneen kàddu gi ba noppo.

## 10

### *Jaar-jaari maam yedd na sët ya*

<sup>1</sup> Bokk yi, bugguma ngeen umple ko, sunu maam yépp la niir wa yieroon, te ñoom ñépp a jàll géej ga\*. <sup>2</sup> Ñoom ñépp lañu sóob sóobeb Musaa, ca biir niir wa, ak ca biir géej ga. <sup>3</sup> Ñoom ñépp, wenn ñamu kéemaanu Yàlla wa, moom lañu lekk, <sup>4</sup> te ñoom ñépp, menn ndoxum kéemaanu Yàlla ma lañu naan, ndax ñoo doon naane ca doju kéemaanu Yàlla ga, doj wa leen doon gunge, te doj wa Almasi la woon. <sup>5</sup> Teewul ñi èpp ci ñoom, Yàlla amul woon lu ko neex ci ñoom, ba tax ñu daanu, dee ca mändij ma.

<sup>6</sup> Yooyu xew-xew ay misaal la, ngir nu baña xemmem yëf yu bon, na ko maam ya daan

---

\* **10:1** 10.1 Ba bànni Israyil nekkee ca mändij ma, Boroom bi moom ci boppam moo leen jiite woon, mel ni aw niir, ag bëccëg ngir gindi leen, su guddee mu doon taxaaru sawara, ngir niital leen. Seetal ci *Mucc ga* 13.20—14.31.

xemmeme. <sup>7</sup> Buleen doon ay jaamukati tuur, ni ko ñenn ci ñoom doone woon. Noonu lañu binde ne: «Mbooloo ma toog, di lekk ak a naan, nes tuut ñu jóg, di mbumbaay†.» <sup>8</sup> Bunu jëfe powum séy, ni ko ñenn ci ñoom daa defe, ba tax ñaar fukki junni ak ñett (23 000) ca mbooloo ma bokk dee ci benn bés. <sup>9</sup> Bunu wut itam Almasi, ni ko ñenn ci ñoom wute woon, ba tax ay jaan rey leen. <sup>10</sup> Buleen jàmbat, ni ñenn ci ñoom doon jàmbate, ba tax malaakam reykat ba rey leen.

<sup>11</sup> Xew-xew yooyu dal maam ya ay misaal la, te dees koo bind ngir nu jànge ci, nun ñi mujug jamono yemool. <sup>12</sup> Moo tax ku yaakaar ne taxaw nga, nanga moytu bala ngay daanu. <sup>13</sup> Benn nattu dabu leen bu moy nattu yiyl dale. Te it Yàllaa jara wóolu. Yàlla du nangu ngeen tegoo nattu bu ngeen àttanul, waaye nattu ba lay booleek pexe, ma leen cay génne, ba ngeen man koo dékku.

### *Dawleen bokkaale*

<sup>14</sup> Kon kat, samay soppe, dawleen bokkaale. <sup>15</sup> Njort naa ne boroomi xel laay waxal. Kon àtteel-leen seen bopp li ma leen wax. <sup>16</sup> Kaasu barke bi nuy barkeeloo, xanaa du mooy bokk gi nu bokk ci deretu Almasi? Te mburu mi nuy daggoo, du mooy bokk gi nu bokk ci yaramu Almasi? <sup>17</sup> Gannaaw menn mburu la nag, doonte ñu bare lanu, kon wenn yaram lanu, ndax nun ñépp, menn mburu mi lanu bokk.

<sup>18</sup> Xool-leen bànni Israyil ci wàllu deret. Niy lekk yàppu juru sarax gu ñu rendi, xanaa

---

† **10:7** 10.7 Seetal ci Mucc ga 32.6.

bokkuñu ak sarxalukaay bi ab céram? <sup>19</sup> Ana kon lu sama wax jiy wund? Ndax daa wund ne yàpp wu ñu sarxal tuur yi tekki na lenn? Am daa wund ne tuur yi tekki na lenn? <sup>20</sup> Li may wax kay moo di yooyu sarax, rab yi la ñeel, waaye du Yàlla, te bugguma ngeen bokk ak rab yi lenn. <sup>21</sup> Dungeen mana naan ci kaasu Sang bi, naan ci kaasu rab yi. Dungeen mana bokk lekk ci ndabal Sang bi, bokk lekk ci ndabal rab yi. <sup>22</sup> Am danuy yékkati fiiraangey Sang bi? Danu koo ëpp doole?

*Jëfeel say sañ-sañ tey sóoraale nit ñi*

<sup>23</sup> «Sañees na lépp,» lañu wax. Waaye du lépp ay jariñe. «Sañees na lépp,» waaye du lépp ay yokke. <sup>24</sup> Bu kenn sàkku njariñal boppam, waaye sàkkuleen seen njariñal moroom.

<sup>25</sup> Mboolem luy jaay ca ja ba, sañ ngeen koo lekk te bañ cee luqatu lenn luy indi ngànt cim xel, <sup>26</sup> ndax Boroom bee moom àddina, ak li ci biiram.

<sup>27</sup> Bu leen ku gëmul wooyee lekk, su ngeen nangoo, mboolem lu mu leen taajal, lekkleen, te bañ cee luqatu luy indi ngànt cim xel. <sup>28</sup> Waaye bu leen kenn nee: «Lii ñam wu ñu sarxal tuur yi la,» buleen lekk, ndax ka leen ko xamal, ndax itam, ngànt lu wax jiy indi cim xel. <sup>29</sup> Waxuma seenum xel yeen, waaye xelu keneen ka laay wax.

Ana sax lu waral sama sañ-sañu bopp di aju ci àtteb keneen ku am xelam amal ngànt? <sup>30</sup> Bu ma yékkatee kàddug cant ba lekk sama wàll, ana lees may sikke ci aw ñam wu ma sante Yàlla?

<sup>31</sup> Kon nag su ngeen di lekk, mbaa ngeen di naan, mbaa ngeen di defleneen, lépp lu ngeen di

def, wutleen koo terale Yàlla. <sup>32</sup> Buleen may kenn lu muy def njombe: du Yawut yi, du jaambur ñi, du mbooloom Yàlla mi. <sup>33</sup> Noonu laay def man ci sama bopp: ñépp laay wuta neex, ci lépp. Sàkkuwuma sama njariñal bopp, waaye njariñal lim bu gëna takku, moom laay sàkku, ngir ñu texe.

## 11

<sup>1</sup> Ni may roye Almasi, man ci sama bopp, royeleen ma noonu.

### *Póol digle na ñu jekkal jataayu julli*

<sup>2</sup> Maa ngi leen di sant ci ni ngeen may fàttlikoo ci lépp, ak ni ngeen saxoo samay dénkaane, ni ma leen ko dénke.

<sup>3</sup> Waaye nag bëgg naa ngeen xam ne gépp góor, Almasi moo di boppam; jigéen, góor moo di boppam, te Almasi, Yàlla moo di boppam. <sup>4</sup> Kon gépp góor guy julli, mbaa muy waxe kàddug waxyu, bu muuree boppam, suufeel na Almasi, miy boppam. <sup>5</sup> Waaye jépp jigéen juy julli, mbaa muy waxe kàddug waxyu, te muurul boppam, suufeel na jékkérám jiy boppam. Day mel ni bu nelu woon rekk. <sup>6</sup> Jigéen ju nanguwula muuru, bu yeboo xuuf kawaram. Ndegam am na kersay xuuf kawaram, mbaa mu nelu nag, fàww mu muur boppam. <sup>7</sup> Góor moom du muur boppam, ndax mooy takkndeeru Yàlla te moo taxawe darajay Yàlla. Waaye jigéen moo taxawe darajay góor, <sup>8</sup> ndax góor kat, jéleesu ko ci jigéen, waaye jigéen kay lañu jéle ci góor. <sup>9</sup> Góor itam, sàkkeesu ko ngir jigéen, waaye jigéen kay lañu sàkk ngir góor. <sup>10</sup> Looloo tax

jigéen wara fésal kilifteef ci kaw boppam, ndax malaaka yi teew\*. <sup>11</sup> Teewul nag ci yoonu Sang bi, jigéen manula ñàkka wéeru ci góor, góor it manula ñàkka wéeru ci jigéen, <sup>12</sup> ndax ni jigéen bàyyikoo ci góor, noonu la góor juddoo ci jigéen, te lépp fa Yàlla la bawoo.

<sup>13</sup> Seetal-leen ko seen bopp rekk, ndax jekk na ci jigéen, muy julli ci Yàlla, te muurul boppam? <sup>14</sup> Xanaa ni àddina ci boppam tèdde xamalu leen ne yar kawar gàcce la ci góor? <sup>15</sup> Ndaxam kawar gu bare sagu jigéen la. Jigéen lañu jagleel kawar gu bare, muy muuraayam. <sup>16</sup> Waaye ku bëgga werante ci leneen it, nun loolu du sunu baax, te du baaxu mbooloom Yàlla mi.

### *Jekkal-leen reeru Sang bi*

<sup>17</sup> Waaye lii ma leen digal, am na ci lu ma leen gérémewul, ndax du njariñ la seeni ndaje di jur, xanaa loraange. <sup>18</sup> Benn, dégg naa am na ay féewaloo ci seeni ndaje, te am na lu ma ci gém. <sup>19</sup> Fàww sax mu am ay xaajaloo ci seen biir, ngir ñi seen ngém wér mana fés ci seen biir. <sup>20</sup> Bu ngeen dajee benn bérab, bokk reeru Sang bi taxul, <sup>21</sup> ndax bu ngeen dee lekk, ku nekk, reeru boppam lay jékkantee lekk, ba tax ñenn ci yeen xiif, fu ñeneen naane ba mändi. <sup>22</sup> Xanaa amuleen kér yu ngeen di lekke ak a naane? Am mbooloom Yalla mi ngeen sofental, di rusloo ñi amul? Ana lu ma leen di wax? Dama leen koy gérëme? Loolu de duma leen ci gérëm.

<sup>23</sup> Man, li ma jéle ci Sang bi, moom laa leen jottli: Sang Yeesu, guddi gi ñu ko woree, dafa

---

\* **11:10** 11.10 Seetal ci *Efes* 3.10.

jël mburu, <sup>24</sup> yékkati kàddug cant, dagg ko, ne: «Lii moo di sama yaram wi leen ñeel. Deeleen def lii, di ma ko fàttlikoo.» <sup>25</sup> Noonu itam la def ak kaas ba, gannaaw reer ba, ne leen: «Kaas bii mooy kóllëre gu yees gi fasoo ci sama deret. Deeleen def lii, di ma ko fàttlikoo, saa yu ngeen ci naanee.» <sup>26</sup> Saa su ngeen lekkee mburu mii, mbaa ngeen naan ci kaas bi, yégle ngeen deewug Sang bi, ba kera muy ñëw.

<sup>27</sup> Moo tax, képp ku jekkadi nu mu lekke ci mburu mi, ak nu mu naane ci kaasu Sang bi, tooñ nga yaramu Sang bi, ak deretam. <sup>28</sup> Kon na ku nekk seetlu boppam, doora lekk ci mburu mi, naan ci kaas bi. <sup>29</sup> Ndax ku lekk mburu mi, naan ci kaas bi, te geddaalul yaramu Almasi, mbugalu boppam la lekk, naan ko. <sup>30</sup> Looloo tax ngeen bare ñu néew doole, ak ñu xiibon, ba lim bu takku dee. <sup>31</sup> Su nu doon àtte sunu bopp, deesu nu àttee noonu. <sup>32</sup> Waaye Boroom bee nuy àttee ay mbugalam ngir yar nu, ba deesu nu mbugalaale ci biir àttab àddina.

<sup>33</sup> Kon nag bokk yi, bu ngeen dajee, ngir bokk lekk, xaaranteelen. <sup>34</sup> Ku xiif, na lekke këram, ngir seeni ndaje bañ leena yóbbe mbugal.

Yeneen mbir yi nag, bu ma dikkee, dinaa ko leeral.

## 12

### *May bare na te wuute*

<sup>1</sup> Léegi nag bokk yi, bugguma ngeen umple ci wàllu mayi Noowug Yàlla. <sup>2</sup> Bokk yi, xam ngeen ne ba ngeen dee ay yéefar, dees leena

buuboon, lajjal leen, jëme ci ay tuur yu téllee wax. <sup>3</sup> Moo tax ma di leen biral ne amul kenn kuy waxe Noowug Yàlla ku naan: «Alkànde ñeel na Yeesu.» Te it kenn manul ne: «Yeesu moo di Sang\*,» te du lu ko Noo gu Sell gi xamal.

<sup>4</sup> Mayi Noo gi wuute na, waaye genn Noo gi la. <sup>5</sup> Liggéeyin yi man naa wuute, waaye benn Boroom bi la. <sup>6</sup> Jéf ji it man naa wuute, waaye jenn Yàlla ji mooy jéf lépp ci ñépp.

<sup>7</sup> Ku nekk nag, ak na mayu Noo giy feeñe ci moom, ngir jariñe. <sup>8</sup> Kii ci Noo gi la jote kàddu gu xelu, kee séddoo kàddug xam-xam ci genn Noo gi. <sup>9</sup> Kale jagoo ngém ci genn Noo gi, ka ca des jéle mayug faje ci genn Noo googu. <sup>10</sup> Kii itam di def ay kéemaan, kee di waxe kàdduy waxyu, kale mana ràñnatle noo yu wuute, keneen di làkk xeeti làkk yu wuute, ka ca des mana firi ay làkk. <sup>11</sup> Loolu lépp, genn Noo googu moo koy def, ku nekk, mu sédd la ci, ni mu ko soobe.

### *Cér bare na, te yaram di wenn*

<sup>12</sup> Noonu yaramu nit nekkee wenn te di cér yu bare, ak noonu mboolem céri yaram dee wenn yaram wi, ak li cér yiy bare lépp, noonu rekk la itam ci Almasi. <sup>13</sup> Ci genn Noo gi lañu nu sóobe ci biir wenn yaram wi, nun ñépp, nu diy Yawut, mbaa nu diy jaambur, nu diy jaam, mbaa nu diy gor, te nun ñépp, genn Noo gi lañu nu nàndale.

<sup>14</sup> Yaram du bennab cér, waaye cér yu bare la. <sup>15</sup> Bu tànk noon: «Gannaaw man duma loxo, kon bokkuma ci yaram,» loolu du ko teree bokk ciw

---

\* <sup>12:3</sup> 12.3 Li nu wax fii mooy Yeesu gannaaw ba mu deeyee, ba dekki mooy Sangu àddina wérngal këpp.

yaram. <sup>16</sup> Te bu nopp noon: «Gannaaw duma bët, kon bokkuma ciw yaram,» loolu du ko tee bokk ciw yaram. <sup>17</sup> Su yaram wépp doon bët, ana nooy dégge? Su lépp doon nopp, ana nooy xañtoo? <sup>18</sup> Waaye Yàlla moo teg cér bu ci nekk ci yaram wi, ni mu ko soobe. <sup>19</sup> Bu lépp doon benn cér, kon ana yaram wi? <sup>20</sup> Cér yi daal bare nañu, waaye wenn yaram wi la.

<sup>21</sup> Bët nag manul ne loxo: «Soxlawuma la!» Te bopp it manul ne ay tànk: «Soxlawuma leen!» <sup>22</sup> Céri yaram yi gëna niru lu néew doole sax, ñooy cér yi manula ñàkk. <sup>23</sup> Cér yi ñu gëna jàpp ne jarula gëddaal, cér yooyu sax lañu gënatee gëddaal. Sunu cér yi amul sutura, ñoom lañu gëna suturaal, <sup>24</sup> te yi am sutura soxlawuñoo suturaal. Waaye Yàlla moo sàkk sunu yaram, sàkkin wu mu ràññee cér yi gëna néew gëddë, te moo leen gëddaal, <sup>25</sup> ngir xaajaloo baña am ciw yaram, te cér yi mènkoo ci di bàyyeente xel. <sup>26</sup> Bu benn cér mettee, mook cér yépp ay bokk metit wi. Bu dee benn cér lañu teral, mook cér yépp ay bokk bânnexu.

<sup>27</sup> Yeen nag yeenay yaramu Almasi, te yeenai diy céram, ku ci nekk ak wàllam. <sup>28</sup> Ni Yàlla tabb ci biir mbooloom gëmkat ñi, ñi ci jiitu ñoo di ndawi Almasi. Ñaareel bi di ñiy waxe kàddug waxyu, ñetteel bi di jànglekatì kàddu gi. Ni ci topp di ñiy def ay kéemaan, ñi ci topp di ñi am mayu faje, ak ñi mane dimbalee, ak ñi mane jiite, ak ñiy lakk yeneen xeeti lakk. <sup>29</sup> Ndax ñépp ay ndawi Almasi? Am ñépp ay waxe kàdduy waxyu? Am ñépp ay jànglekatì kàddu gi? Am

ñépp ay def ay kéemaan? <sup>30</sup> Am ñépp a am mayu faje? Am ñépp ay làkk yeneen làkk? Am ñépp a mane tekki ba? <sup>31</sup> Teewul nag, nangeen sàkku may yi gën.

### *Cofeel moo gën lépp*

Waaye dinaa leen xamal yoonu dundin wi gën ci lépp.

## 13

<sup>1</sup> Su ma doon làkk làkki nit ñi, ak yu malaaka yi sax, te jëfewuma genn cofeel, jóolóoli bu xumb doñj laa, mbaa téggiwaxyu, boole ci xam mboolem kumpa, ak mboolem xam-xam, ak ngëm gu mat sëkk ba mana toxal ay tund, te jëfewuma cofeel, duma dara. <sup>2</sup> Su ma jotoon ci kàddug waxyu, boole ci xam mboolem sama alal, ba sarxe sama yaramu bopp ngir ñu lakk ko\*, su ma jëfewul cofeel, loolu du ma jariñ dara.

<sup>4</sup> Cofeel nag, muñ ak mbaax la. Cofeel bokkul ak kiñaan, bokkul ak jikkoy kañu ak a damu. <sup>5</sup> Bokkul ak jéf ju jekkadi, ak jiital sa njariñal bopp, bokkul ak naqari deret, bokkul ak denc mer. <sup>6</sup> Bokkul ak bége lu jubadi it, waaye moo di bége liy dëgg. <sup>7</sup> Cofeel moo di: lépp, nga bale; lépp, nga gëm; lépp, nga yaakaar; lépp, nga dékku.

<sup>8</sup> Cofeel nag du jeex mukk. Su dee kàdduy waxyu, dina wéy; su dee ay làkk, dina selaw; su dee xam-xam, dina xewi. <sup>9</sup> Ndaxte as ndog lanu xam, te as ndog lanuy waxe kàddug waxyu.

---

\* **13:3** 13.3 mbaa ba man koo damoo.

<sup>10</sup> Waaye keroog bu li matale dikkee, ndog si wéy.  
<sup>11</sup> Ba ma dee tuut-tànk, ni tuut-tànk laa doon waxe, di dégge déggingu tuut-tànk, di xalaate ni tuut-tànk. Waaye bi may mag laa xewil yëfi tuut-tànk. <sup>12</sup> Tey jii ci ab seetu lanuy gise gis-gis bu lënt. Waaye bu keroogee, màkk lanuy jàkkaarloo ak li nuy xool. Tey jii, as ndog laa xam, waaye su keroogee, ni ñu ma xame, ni laay xame ba mu mat sëkk.

<sup>13</sup> Léegi nag liy sax moo di: ngëm ak yaakaar ak cofeel; yii yett la, te li sut ci yooyii moo di cofeel.

## 14

*Lu jëm ci waxyu, aki may ci wàllu làkk*

<sup>1</sup> Xintewooleen cofeel, te ngeen sàkku mayi Noo gi, rawatina mayug waxe kàddug waxyu,  
<sup>2</sup> ndax kiy làkk weneen làkk, du nit ñi lay waxal, waaye Yàlla lay waxal, gannaaw kenn déggul li tuy wax. Teewul ci Noo gi lay waxe ay kumpa. <sup>3</sup> Waaye kiy waxe kàddug waxyu, nit ñi lay waxal, di feddlee, di ñaaxe ak di naabe. <sup>4</sup> Kiy làkk yeneen làkk, boppam lay feddli, waaye kiy waxe kàddug waxyu, mbooloom gëmkat ñi lay feddli seen ngëm. <sup>5</sup> Su ma sañoon ngeen di làkk yeen ñépp yeneen làkk, waaye ngeen di waxe kàddug waxyu moo ma gënäl. Kiy waxe kàddug waxyu moo épp njariñ kiy làkk yeneen làkk, ndare ñu tekki li tuy làkk, ba mbooloom gëmkat ñi jële ca lu ñu feddlikoo. <sup>6</sup> Léegi bokk yi, su ma leen dikke woon yeneen làkk yu may làkk, ana lu ma leen di jariñ? Dara, xanaa ma àgge leen kàddug peeñu, mbaa xam-xam,

mbaa waxyu, mbaa digle. <sup>7</sup> Noonu la itam ci jumtukaayi po yi dundul tey jibal coow; muy toxoro mbaa xalam. Su yooyu jumtukaay jibalul galan yu leer, ana nees di xame li toxoro ji, mbaa xalam giy wax? <sup>8</sup> Ag liitu xare it, su jibalul woote bu leer, ana kuy waajal ab xare? <sup>9</sup> Noonu la ci yeen itam. Seen làmmiñ, su ngeen ci waxul kàddu gu leer, ana nees di xame li ngeen di wax? Ci jaww ji rekk ngeen di wax! <sup>10</sup> Ak li làkki àddina bare te wuute lépp, wenn ñàkku ci am piri. <sup>11</sup> Baat bu jib nag, su ma xamul tekkiteem, ab jaambur laay doon ci kiy wax, te kiy wax it, ab jaambur lay doon ci man. <sup>12</sup> Kon yeen itam, gannaaw ñu xér ngeen ci mayi Noo gi, fexeleen cee am lu ne xéew, ngir feddli mbooloom gëmkat ñi.

<sup>13</sup> Moo tax kiy làkk weneen làkk wara ñaan ngir ñu xam pireem. <sup>14</sup> Su may ñaan ci weneen làkk, sama xol ay ñaan, waaye samam xel liggéeyul. <sup>15</sup> Kon ana nees di def? Naa ñaane sama xol, tey ñaane samam xel itam. Naa sàbbaale sama xol, tey sàbbaale samam xel itam. <sup>16</sup> Soo yékkatee kàddug cant goo waxe xol doñj, ana nu nit ku xamul ku ko teewe naan: «Amiin,» te xamul li ngay wax? <sup>17</sup> Ndaxam yaw, rafet nga kàddug cant, waaye sa kàddu feddliwul keneen ku ciy dégg.

<sup>18</sup> Sant naa Yàlla ndegam maay làkk yeneen làkk ba raw leen, yeen ñépp. <sup>19</sup> Waaye fu mbooloom gëmkat ñi daje, juróomi baat yu ma waxe samam xel ngir jàngle, moo ma gënal junniy baat yu ma waxe weneen làkk.

**20** Bokk yi, buleen doon ay xale ci wàllu déggin. Su dee lu bon, nekkleen ci ay tuut-tànk, waaye màggleen ci wàllu déggin. **21** Bindees na ci téereb yoon wi ne:

«Ay niti làkk-kat,  
ay làmmiñi doxandéem,  
ci laay waxe ak askan wii,  
te taxul ba tey ñu déglu ma.

Boroom bee ko wax\*»

**22** Kon nag, yeneen làkk, kàddu ya du ci gëmkat ñi la di firnde, waaye ci ñi gëmul la di firnde. Te it waxe kàddug waxyu, du ci ñi gëmul la di firnde, waaye ci gëmkat ñi la dib firnde. **23** Léegi nag su mbooloom gëmkat mépp dajee bérab, ñépp di làkk yeneen làkk, bu ay nit ñu xamul mbaa ñu gëmul duggsee, duñu ne dangeena dof? **24** Waaye su ñépp dee waxe kàddug waxyu, ba ku gëmul, mbaa ku xamul duggsi, kàddu ga la ko ñépp di tiiñale, àggee ko ko ab àtteem, **25** ba la làqu woon ca biir xolam, daldi leer. Su ko defee mu ne dàll dépp jéëm ci suuf, sujjóotal Yàlla, te naan: «Aylayéwén Yàllaa ngi ci seen biir!»

### *Ndajem gëmkat ñi jar naa rafetal*

**26** Kon nag ana nees di def, bokk yi? Bu ngeen dajee, kii am woyu cant, kii am lu muy jàngle, kee am am peeñu, kale am lu muy waxe weneen làkk, keneen am am piri, loolu lépp na ko feddli ngëm taxa jóg. **27** Su dee weneen làkk lees di wax, na ñaar ba gën gaa bare, ñett, toppante, te kenn di firi. **28** Su amul kuy firi, bu kiy làkk làkk

---

\* **14:21** 14.21 Seetal ci *Esayi* 28.11-12.

wi biral lenn ci jataayu mbooloo mi. Na yelu, ngir boppam ak Yàlla.

<sup>29</sup> Niy waxe kàddug waxyu, na ci ñaar ba ñett wax, te ñi ci des natt wax ji. <sup>30</sup> Su keneen ci jataay bi amee am peeñu, na ki doon wax noppi. <sup>31</sup> Ndax kat yeen ñépp man ngeena kenn-kennoo, di waxe kàddug waxyu, ngir ñépp jànge ca, ba gëna farlu. <sup>32</sup> Biralkati kàddug waxyu yi ñoo wara jiite xel mi ñuy waxe. <sup>33</sup> ndax Yàlla du Yàllay salfaañoo, Yàllay jàmm la.

Ci mboolem mboolooy ñu sell ñi nag, <sup>34</sup> na jigéen ñi noppi ci biir mbooloo yi, ndax mayeesu leen ñu wax ci yooyu jataay. Na jigéen ñi nangu, ni ko yoon wi ci boppam diglee. <sup>35</sup> Su amee lu ñu bëgga xam, ca kér ga lañu koy laaj seen jëkkér, ndax jigéen di wax ci biir mbooloom gëmkat ñi, gàcce la.

<sup>36</sup> Ndax ci seen biir la kàddug Yàlla bàyyikoo? Am ci yeen doñj la agsi? <sup>37</sup> Ku ci xalaat ne moom jottlikatub kàddug waxyu la, mbaa boroom ag may la ci Noo gi, war naa xam xéll ne lii ma leen bind, santaaneb Boroom bi la. <sup>38</sup> Ku ci xamul loolu nag, kooku, xameesu ko.

<sup>39</sup> Kon bokk yi, farluleen ci di waxe kàddug waxyu, te buleen aaye kuy làkk yeneen làkk. <sup>40</sup> Waaye na lépp teggine te aw yoon.

## 15

### *Lu jëm ci ndekkitel Almasi*

<sup>1</sup> Léegi nag bokk yi, ma fattli leen xibaaru jàmm bi ma leen xibaaroon, muy lu ngeen gëm, sax ci, <sup>2</sup> te ci ngeen texee, ndegam jàpp ngeen bu

dëgér ci kàddug xibaaru jàmm bi, ni ma leen ko xamale. Lu ko moy ci neen ngeen gém.

<sup>3</sup> Li ma jotoon laa leen jékka jottli, te moo di: Almasi moo dee ngir njotug sunuy bàkkaar, te noonu la ko Mbind mi indee. <sup>4</sup> Denc nañu ko, mu dekki ca ñetteelu fanam, te noonu la ko Mbind mi indee. <sup>5</sup> Mu feeñu Sefas, teg ca feeñu fukki taalibe ya ak ñaar. <sup>6</sup> Gannaaw gi mu feeñu lu ëpp juróomi téeméeri bokki taalibe yu ko gisandoo, te li ëpp ci ñooñu, ñu ngi dund ba léegi, doonte am na ñu ci nelaw. <sup>7</sup> Gannaaw gi mu feeñu Yanqóoba, teg ca feeñu ndawi Almasi yépp. <sup>8</sup> Man nag la mujja feeñu, te ma dib liir bu ab juddoom moy bésam, <sup>9</sup> ndax kat maa gëna ñakk solo ci ndawi Almasi, te yeooowuma sax turu ndaw, gannaaw maa doon bundxatal mbooloom Yàlla mi. <sup>10</sup> Ci yiwu Yàlla daal laa doone ki ma doon, te yiwoowu ma ñeel neenul. Xanaa yeneen ndaw yépp sax, maa leen gëna liggey. Du ci man nag, waaye yiwu Yàlla, wi ànd ak man la. <sup>11</sup> Kon muy man, di ñoom, noonu lanu waaree, te noonu it ngeen göme.

### *Dekkal tewul Yàlla*

<sup>12</sup> Ndegam biral nañu ne Almasi dekki na, ana nu ñenn ci yeen mane ne ñi dee duñu dekki? <sup>13</sup> Su fekkee ne ñi dee duñu dekki, kon Almasi it dekkiwul. <sup>14</sup> Su Almasi dekkiwul, sunu waare neen na, te seen ngém it neen na. <sup>15</sup> Te su boobaa nag ñu war noo jàppe ay seedey fen-kati Yàlla, ndax noo seedeel Yàlla, ne moo dekkal Almasi te dekkalu ko, gannaaw ñi dee duñu dekki. <sup>16</sup> Ndaxte ñi dee, su ñu dul dekki kay,

Almasi it dekkiwul. <sup>17</sup> Su Almasi dekkiwul nag, seen ngém amul njariñ, te yeena ngi ci seeni bakkhaar ba tey. <sup>18</sup> Te kon it ñi dee gannaaw ba ñu gëmee Almasi, sàngku nañu. <sup>19</sup> Su dee ci giiru dund gii doñj lanu ame yaakaar ci Almasi, kon de noo gëna toskare ñépp.

<sup>20</sup> Waaye nag Almasi dafa dekki moos, te mooy saraxu ndoortel meññeef, bi ñu sàkke ci ngóobum bakkani nit ñi dee. <sup>21</sup> Ci nit la ndee dikke ci àddina. Moo tax ci nit itam la ndekkite dikke ci àddina. <sup>22</sup> Noonu nit bokke ci Aadama, ba tax ñépp di dee, noonu la ñépp mana bokke ci Almasi, ba tax ñu dundalaat leen, ñoom ñépp. <sup>23</sup> Waaye ku nekk ak ayam. Jooxeb ndoortel meññeef mi, Almasi la. Gannaaw loolu ñoñi Almasi ñooy aye, keroog bu délse. <sup>24</sup> Gannaaw loolu la muj ga, te ca lay delloo nguur gi kiy Yàlla, di Baay, fekk mu neenal mboolem luy kilifteef, ak mboolem sañ-sañ ak doole. <sup>25</sup> Ndaxte fàww Almasi nguuru, ba kera Yàlla di sukkal mboolem ay noonam ciy tànkam. <sup>26</sup> Noon bu mujj, bi ñuy neenal mooy ndee, <sup>27</sup> ndax «Lépp la Yàlla di jébbal Almasi, teg ko fi ron ndëgguy tànkam\*.» Waaye bu Yàlla nee, «lépp la koy jébbal,» bir na ne moom mi ko jébbal lépp, bokku ci. <sup>28</sup> Bu ñu ko jébbalee lépp nag, su boobaa moom Doom ji ci boppam mooy jébbal boppam, ki ko jébbal lépp, ngir Yàlla di lépp ci lépp.

<sup>29</sup> Su fekkee ne ñi dee duñu dekki, kon ñi ñu sóob ci ndox ngir ñi dee, lu ñu koy def, doye? Gannaaw ñi dee duñu dekki, ana lees leen di sóobe ngir ñi dee? <sup>30</sup> Te kon nun it, ana lu jar

---

\* **15:27** 15.27 Seetal ci *Sabóor* 8.7.

nuy jaay sunu bakkan waxtu wu nekk? <sup>31</sup> Bokk yi, man de bés bu nekk ma jàkkaarlook ndee, ak sag bi ma leen di sagoo ndax Yeesu Almasi sunu Boroom, mi ngeen gém. <sup>32</sup> Su yaakaaru nit ci àddina doñj taxee may xeex ak ay rabi àll ca Efes, ana lu mu may jariñ. Gannaaw ñi dee duñu dekki, kon kay mooy li ñu ne:

«Nanu lekk te naan, nde ëllëg nu dee†.»

<sup>33</sup> Bu leen kenn nax: «Ànd bu bon yàq na jikko ju baax.» <sup>34</sup> Délloosileen xel yi ci njub te bàyyi bàkkaar, ndax ñàkka xam lenn ci Yàlla, moom la ñenn ci yeen nekke, te loolu gàcce la ci yeen, laa wax!

### *Yaram bare na te wuute*

<sup>35</sup> Teewul nit a ngi naan: «Nan la ñi dee di dekkee? Wan yaram lañuy dekkaale?» <sup>36</sup> Gàtt xel! Li nga ji, yaw ci sa bopp, du dundaat li feek deewul ba noppi. <sup>37</sup> Te li nga ji du yaramu gàncax giy ñëw, aw fepp kese la, man naa doon bele, mbaa weneen jiwu. <sup>38</sup> Waaye Yàllaa koy yaramal ni mu ko soobe, te jiwu wu nekk ak yaramu gàncaxam. <sup>39</sup> Suux yépp nag du wenn suux wi. Wii suux wu nit la, wee wu mala, wale wu picc, wa ca des wu jën. <sup>40</sup> Am na itam ay yaram yu farewoo asamaan, ak ay yaram yu farewoo suuf. Yaram wu farewoo asamaan nag, ag leeram wuute na ag leeru yaram wu farewoo suuf. <sup>41</sup> Jant bi ak leeru boppam, weer wi ak leeru boppam, biddiiw yi ak seen leeru bopp, te biddiiw sax wuute naak moroom ma, ag leer.

---

† <sup>15:32</sup> 15.32 Seetal ci *Esayi* 22.13.

<sup>42</sup> Noonu itam la ndekkitel ñi dee di deme. Li ñu suul mooy jiwu wi yàqu, te bu dekkee dootu yàqu. <sup>43</sup> Ci ag teddadi lañu ji néew bi fiu suul, te teraanga lay dekkaale. Ci néew doole lees ko ji, mu dekkaale doole. <sup>44</sup> Li ñu suul mooy yaramu judduwaale wi ñu ji, mu dekki di yaram wuy dunde Noo gi. Ndaxte ni yaramu judduwaale ame, ni la yaram wuy dunde Noo gi ame.

<sup>45</sup> Noonu lañu binde ne: «Aadama, nit ku jëkk ka, lañu def jëmm juy dund†,» waaye Aadama mu mujj mi moo di Noo giy dundloo. <sup>46</sup> Du yaram wi bindoo ag noo nag mooy jiitu, waaye yaramu judduwaale wi mooy jiitu, yaram wi bindoo ag noo topp ci. <sup>47</sup> Aadama mu jëkk ma, ci suuf la jóge woon, di suuf; Adamam ñaareel mi jóge fa asamaan. <sup>48</sup> Kooka di suuf nag, na mu mel, ni la niti suuf mel. Ku asamaane ka it, na mu mel, ni la ñu asamaane ñi mel. <sup>49</sup> Te ni nu doone tey, takkndeeru nitu suuf ka, noonu lanuy dooneji takkndeeru ku asamaane ka.

<sup>50</sup> Li may wax bokk yi, moo di suux ak deret du am cér ci nguurug Yàlla, te luy yàqu manula am cér ci lu dul yàqu. <sup>51</sup> Kaayleen ma xamal leen mbir mu umpe. Dunu dee nun ñépp, waaye nun ñépp ay soppiku. <sup>52</sup> Lu gaawa gaaw lay doon, ci xef ak xippi, bu liit gu mujj ga jibee; nde liit ga mooy jib, ñi dee, dekki, di ñu dul yàqooti, nun nag, nu soppiku. <sup>53</sup> Sunu yaramu judduwaale wii nara yàqu, fàww mu sol weneen wu dul yàqu; sunu yaramu ndee wii, fàww mu sol yaramu deetil. <sup>54</sup> Bu yaramu judduwaale wii nara yàqu

---

† **15:45** 15.45 Seetal ci Njàlbéen ga 2.7.

solee weneen wu dul yàqu, ba yaramu ndee wii  
sol yaramu ndeetil, su boobaa la kàddu gii ñu  
bind di mat:

«Mëddeeñ na ndee ci géeju ndam§.

<sup>55</sup> Moo yaw ndee, Ana sa ndam?

Moo yaw ndee, ana sag fitt\*?»

<sup>56</sup> Ndee, ag fittam mooy bàkkaar, te bàkkaar,  
dooleem mooy Yoon wi. <sup>57</sup> Waaye cant ñeel  
na Yàlla, mi nu may ndam ci sunu Sang Yeesu  
Almasi!

<sup>58</sup> Kon nag yeen sama bokk yi ma soppal  
sama bopp, farluleen, bu leen dara yëngal, te  
saxooleena jëm kanam ci liggeeyu Sang bi, te  
ngeen xam ne seenu ñaq, ci seenub ànd ak Sang  
bi, du neen.

## 16

### *Lu jëm ci ndimbal lu ñeel gëmkati Yerusalem*

<sup>1</sup> Ci wàllu ndimbal li jëm ci gëmkat ñu sell ñi,  
noonu ma ko digale mboolooy gëmkati diiwaanu  
Galasi, yeen itam defeleen ko noonu. <sup>2</sup> Bés bu  
jëkk ci ayu bés yi, na ku nekk génne as lëf ca  
la mu am, na mu ko àttane, te mu dencal ko  
boppam, ngir bu ma dikkee, dootu soxlaa wér, di  
dajale. <sup>3</sup> Bu ma dikkee, ñi ngeen tånn, ñoom laay  
yebale ab bataaxal, ngir ñu yóbbu Yerusalem  
seen ndimbal. <sup>4</sup> Su aajoo ma dem man itam, ñu  
ànd ak man.

### *Póol mébét na, dénkaane na*

---

§ **15:54** 15.54 Seetal ci *Esayi* 25.8. \* **15:55** 15.55 Seetal ci *Ose*  
13.14.

<sup>5</sup> Dinaa dikk ba ci yeen, gannaaw bu ma jaaree diiwaanu Maseduwan, ndax Maseduwan laay jaare. <sup>6</sup> Man naa am ma yàgg ci yeen, jombul sax ma lollikoo fi yeen. Su ko defee ngeen yiwi ma, ma dem, ak fu ma mana jëm. <sup>7</sup> Ndaxte itam, buggumaa jaare fi yeen rekk, jàll, waaye yaakaar naa toog ci yeen ab diir, su ko Boroom bi mayee. <sup>8</sup> Waaye ci Efes gii laay toog ba màggalu Pàntakot, <sup>9</sup> ndax bunt ubbikul na ma fi njàpp, ngir liggéey bu am njariñ, te noon yi bare nañu.

<sup>10</sup> Bu Timote dikkee nag, fexeleen ba bumu am lu muy tiit ci seen biir, ndax liggéeyu Boroom bi lay liggéey ni man. <sup>11</sup> Kon bu ko kenn xeeb. Gannaaw loolu nangeen ko yiwi ak jàmm, ba mu délsi ci man, ndax moom laay xaar, mook bokk yi itam.

<sup>12</sup> Mbokk mi Apolos nag moom, soññ naa ko lu bare, ngir mu dikk ba ci yeen, ànd ak bokk yi, waaye fi nu tollu yebuwu ci dara. Teewul bu jekkoo, dina dikk.

### *Yeneen ndigal a ngi aki tággtöö*

<sup>13</sup> Teewluleen te saxoo ngém, góor-góorluleen te dëgërlu. <sup>14</sup> Lépp lu ngeen di def, defeleen ko cofeel.

<sup>15</sup> Bokk yi, xam ngeen ne Estefanas ak njabootam ñooy jooxeb ndoortel meññeef ci diiwaanu Akayi, te jàapple ñu sell ñi lañu séddoo. Kon dama leen di ñaan, <sup>16</sup> ngeen nangul nit ñu mel noonu, ñoom ak mboolem ñu bokk ak ñoom liggéey bi ak coono bi. <sup>17</sup> Maa ngi bége teewaayu Estefanas ak Fortunatus ak Akaykus, ndax bi ngeen wuutee tey, ñoo leen taxawal. <sup>18</sup> Dalal

nañu sama xel, ak seen mos, yeen itam. Kon nit  
ñu mel noonu, fonkleen leen.

<sup>19</sup> Mboolooy gëmkati diiwaanu Asi nag ñu ngi  
leen di nuyu. Akilas ak Pirsil, ñu ngi leen di nuyu  
bu baax ci turu Sang bi, ñoom ak mbooloom  
gëmkat ñiy daje seen kér. <sup>20</sup> Bokk yépp a ngi  
leen di nuyu.

Saafoonteeleen fónante yu sell.

<sup>21</sup> Man Póol maa bind nuyoo bii ci sama loxol  
bopp.

<sup>22</sup> Ku buggul Sang bi, na alku. Maranata (mu  
firi sunu Sang, dikkal!)

<sup>23</sup> Yal na yiwu Sang Yeesu ànd ak yeen.

<sup>24</sup> Sama cofeel ñeel na leen, yeen ñépp, ci  
Yeesu Almasi mi nu bokk.

**Kàddug Yàlla gi  
Wolof Bible 2020 revision.  
La bible en wolof, revision 2020**

copyright © 2010, 2020 La Mission Baptiste du Sénégal

Language: Wolof

Dialect: Regional Wolof

Translation by: La MBS

For complete copyright statement, please see <http://sng.al/copyright>

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-07-22

---

PDF generated using Haiola and XeLaTeX on 11 Nov 2022 from source files dated 23 Jul 2020  
eb088fb7-76e3-5c5f-ab35-a0da6cd8fd40